

四庫全書

集部

欽定四庫全書卷

嵩山集卷三十八

宋 晁公遡 撰

劄子

楊運使

黃濁返壑江水清平正宜鼓枻下硤伏惟建節而東神
相行邁台候萬福某正遠參覲所冀恬養冲襟即趨廣
朝

二

某每歎風儀玉立蓋是總章中人物不宜在外服日日
須鋒車至乃賀耳今審往領荆湖輓輸廟堂豈復重勞
以計籍哉殆以入覲道近故也計璽召已來更不為墨
啓恐行李中裁報為勞併冀台察

三

某比在益州即蒙眷接有如素交綢繆至意施及孫椽
蒙披論奏拳拳感刻銘於衿抱忽聞牙樯東峙徑自巴

中以行不獲奉一觴以送鷁首不勝馳心

張提刑松允

某昨見敕目伏審遂膺禮樂之遣則馳一駟賀於節下
度已半道矣遠承長牋為謝某但與朋舊歡喜豈敢當
此禮耶忽忽作報前書已悉具矣併冀台察

羅參議

仄聞學道之至清心宴坐事來則應故不欲以虛言之
問更煩開覽遂若自疎于門庭顧乃情則極馳向也夏

氣已炎伏惟大府每事詢仰台候勝常某正阻良覲惟祈步趨實下前膺有道之徵

二

某迂愚不任為郡充位于此忽然踰年非諸公長者保持之久已汰遣矣幸甚幸甚嚴成忠近自帳下來云左右謂某於公事之間若有疑於統府某安有是哉某平日於訟牒初亦無意有所輕重過亦忘之矣伏冀台察

吳鈐轄

久雨近止氣遂清和伏惟總戎一道神明所相台候萬福某末由叅詣所祈養性願神前授齋鉞

二

某近嘗上記未遑嗣遣音介方切懷向今日忽於郵中伏奉教誨感喜兼并所諭張師顏具知之矣伏冀台悉

三

風日頗清寒不省宴居何如伏惟布政和門神明所相台候勝常某末由趨謁所冀盡消息理前建旄節

四

某賴庇存已復期年無事不欲為虛言之問以勤通覽
但有馳心伏辱手誨寵問甚至感愧不可言馬監押遠
涉江湖而歸敢不知其勞勩伏幸台照

范運使

某連奉二誨感愧之餘因省起居狀下情至慰日將履
長恭惟偃節未行神相徒馭台候動止萬福末由趨謁
敢乞持精養神遂登計相

二

某投老無聞其或有知之者不過節下一二公耳亦不敢忘此識察之意近審利東使者之節已至恨不得從賓客賀但遙慶其部父老將被德施也近多言闕外以牛計租一牛有歲納六七十斛者其敝不可勝言節下必為振救之幸甚幸甚查漕印書即以紙付書肆須鄭明至當授之併乞台察

程知郡

麥可嘗矣伏惟優游里舍喜此食新台候萬福未間更
祈厚自持改賜輶傳

二

久聞大門與蘇石為一州之望所積既厚人才輩出蓋
至今也顧如左右所至不止三最正當蜀士彙征之時
不應獨未被尺一耳行且見之

三

某壬午冬道過遂州公實乘泥軾在焉初意得識老成

之風儀不謂適出行縣乃心悵悵今未衰也豈料將有
承教之便於此其何喜似之

四

某止欲得祿食耳不意廟堂不量其愚畀此名邦方欲
訪耆哲而求未聞以為迂拙之指南先蒙記存貺以札
翰感忤大不可言更須面謝

唐知郡

數日天氣淑清伏惟高臥在家安於爽塏台候萬福未

間更祈嗇養冲粹益究耆艾之祉

二

某嘗惜博大之用滯於外服今耄期稱道猶宜膺大政之咨不應尚居里巷也惟喜此方漸染君子之澤為多耳幸甚

三

某比得見於夔門雖足慰其景慕之懷其如左右在行後不劇言集一笑之歡翻為惘惘矣易守而來喜遂室

通顧衰慵困於應接未及先以書走廬下遠承勞問感
忤不勝道也

四

某之才為之小則可耳今來治此才智之民何以勝其
任公能告以所未聞而補其所不逮乃區區望於朋舊
也

蘇知郡

數日不瞻晤方切懷詠辱手示欣省甲舍安隱台候勝

常敬具此修報

二

比屈熊軾一來而漿酒臠肉不精都不足致陶然至今
為愧何辱謝也羣騶須券食已付邑主者矣尚有它委
否

三

久聞熊軾當歸今日忽奉手誨喜可知也風日正爾妍
和伏惟見故山草木意自休暢台候勝常未間更祈厚

加調適佇觀河潤九里

四

某比至郡未及修問先辱華牋所以撫存甚寵至今愧
不能滿此意也終日汨汨簿書間欲繼為一番之書竟
亦不辦積年之懷何由宣寫喜聞朝夕至郭下併須面
究

嘉州知郡

比來草木鮮榮伏惟千騎行春與民同樂台候勝常某

遙歎高風無由良會惟祈盡珍重理前膺禮樂之遣

二

某既未得奉色辭直思日日為問顧不欲奪裁剝而勤
修報耳近婦兄問立君來備言眷接異於輩儕敢謂不
鄙迂拙而辱顧之因施及其外屬感刻何可言敬具此
謝

程達州

日日望熊軾尚未來極懷向辱手示欣省戒途有日台

候勝常賢從子欲叅外選一一如所諭某四日暫往視
通濟堰往返只數日耳敢問雙旌何時至郭下乎未間
千萬保嗇前膺表用

又

獻歲已數日伏惟陽和充庭台候勝常未間更祈頤神
益壽進領輓輸

又

元日不得賀廬下又不能致區區之禮特辱來告深相

贊頌益增慚悚十騶并廩食具久矣更聽後旨也

又

遙想林廬清勝無復暑氣伏惟台候超然未間更以順
令薄滋味為請以俟增秩

又

某日懼為政不滿邦人之望不省亦有以相規否示喻
程處約取蔭自其本宗不謂重勞台慮也秋涼能枉熊
軾見顧乎

范知郡

仲月多雨殊清伏惟安於甲舍體府自康台候勝常瞻
晤末日更祈調適復初以究遐祉

二

比因侍史歸奉報并致奉錢矣潯承手誨感感刻刻送
騶十二已還火伍中餘留使令於前無傷也它有委否
程邛州

久不聞問不省台用比何如田野風日晏溫伏惟熊軾

將駕台侯勝常日佇臨顧慰此傾向更祈厚嗇前賜節傳

又

近日益州歸亦小憊未能問諸舍下先承手誨勞苦感愧不可言也某忽忽七告朔于此終無可紀以副羣望公何譽之深乎正願求所以施於一邦者見教某尚何有出於公之意外者耶

又

涉夏以來白鶴山爽氣日加伏惟宴坐甚清神相布政
台候勝常某末由叅詣更冀全真養和前膺軟輪之召

又

某治郡不進常恐為門庭羞日望有以誨其不逮忽承
為不肖子開說驚怛良久此公事不得曲聽愧仄愧仄
併祈台察

又

天氣始爾開霽漸可御絺綌伏惟鈴下無事神相清淨

台候萬福某末由叅詣更祈盡消息理前賜節傳

又

某不勝郡寄日不暇給遂疎上記但有馳向忽奉手誨
得聞起居喜慰之外且增慚忤示諭備悉更有他委願
聞之

又

涉冬不聞起居狀不省台用比何如白鶴山高氣當寒
泣伏惟政成坐嘯神明並貺台候萬福某尚賒良覲更

冀繕爵輔生前賜盛漢之節

又

某於此忽八告朔矣迂拙當劇郡曠瘼甚多常憂不稱
平日論薦不賜一言之誨何也今歲東隄又當修遣人
往市隄材敢望戒津吏蠲其筭緡使此隄亟成邦人不
敢忘枌榆之蔭所及也想在高明必念及此幸甚幸甚

呂嘉州

游問

歲垂盡伏惟九頂之下和氣充塞台候勝常某婦兒間

丘君行臺已有檄罷之願為保持得亟去幸甚未有詣公座之日所祈珍嗇前升台室

二

某此遣伉步持齋釀以奉椒觴輒忘其味薄也方愧不足飲長者遠承函使臨門分以兕觥之餘洗醖開嘗便覺有泱泱大國之風當戒酒人自今用此典型也感刻不勝道紙短不能伸寫

嵩山集卷三十八

欽定四庫全書

集部

嵩山集卷

三十九至
四十二

詳校官起居注主事_臣顧宗泰

主事_臣呂雲棟覆勘

總校官進士_臣繆琪

校對官中書_臣王家寶

謄錄監生_臣朱學廉

欽定四庫全書

嵩山集卷二十九

宋 晁公遡 撰

劄子

謝知郡

某久聞歸休甲舍而日困於簿書期會欲遣一番相勞
苦至今未能也愧仄何言即日草木已萌動伏惟衿抱
受此始和台候勝常未有見日更祈耄期稱道過於喬

松前膺乞言之拜

二

公解臨江印綬久矣何尚未賜左符乎今日為邦無復古之樂者得從容廬里却似差勝耳賢從子來此郡庭望分憂然其性似寬緩更告佩之弦以戒之為佳

章閬州

在梁山時辱幽使臨之自爾不復聞音息不省台用比何如南陸修景伏惟政成已久千里緩帶神明寵相台

侯勝常各守一邦未有會期更冀盡珍重理前建盛漢之節

二

某比為郡終更得以理去已幸乃復被命易守眉陽短淺無聲稱何以得此皆庇存所及耳久欲為一牋謝於長者始至不勝簿領之煩迨今少閒遣此介通訊亦已晚矣愧仄何言向來久在硤內不能具暑服治所出嘉穀輒因是往錢引二十告為求之市鋪耳修交隣之問

而遽以溷執事惟恃眷照乃然更祈台亮

程知郡勤

數日江雨時作涼暄殊未定伏惟甲舍高明啓處具宜
台候勝常未間更冀厚自持前有趣召

二

某比過廬下特勞熊軾釋燕安之樂而遠至道周此意
非衰鈍所宜致也欲為一書以謝而始至不暇先承貽
問尤增感愧

三

某唯者哲居是邦為其長吏者所宜加禮以勤里閭況
執事耶所諭使令不足於前敢不曲聽但營兵出戍他
州及充牽馬之後日為上司督責尚未能也輒納公移
去切幸台亮

宋隆州 誨

仲月頗多雨不特解邑屋煩鬱稻粟亦美伏惟治部阡
陌有佳色坐嘯對之台候萬福某末由瞻謁更冀導養

得理前賜節蓋章傳

二

某區區此邦而士多於農詩書多於蓋藏乃靈州也幸
接樂郊日夕思矜式善政有以富之而不能也近蒙計
庭憐其窮空分治所鹽筴見餉敢往請於庾吏所謂以
君之餘而波及於此豈勝感忤所望早為給之幸甚幸
甚

三

幸此壤界日間令音有得於函使往返之外喜慰何可言秋氣頓爾肅清伏惟跨黿之峰爽氣來萃几席政成無事享此宴閒台候勝常某無由與賓客以奉談笑惟祈盡消息理前膺禮樂之遣

四

某短淺不勝千里之寄而屬當窮空之後殆無以給調度賴治所嘗分牢盆之饒及之非惟某拜貺實亦闔郡拜貺也尚有一百十五擔敢以請於鈴下所望矜察其

窮空而盡付以來不勝幸甚

石通判

山中風已寒烈否伏惟台候勝常未間千萬厚自持進
領藩要

二

歲將窮矣董攝封內以應期會亦少勞乎使某得以蒙
成幸也令子來治關市之征某正欲見鋒穎因書勉之

馮通判

泥軾比見過正慰馳懷但恨不可更留談宴以妨曹事
耳辱手示知已休舍疏理填委亦良勞也山氣計已作
寒伏惟台候勝常某按刑已不堪任况兼將漕正望左
右率先此部使餽餉不稽也未間千萬厚自持前升清
途

宇文簡州

師獻

某為貧所驅日投喧闐益覺宴閒可樂伏惟佩二千石
印綬從容林廬臥看遶屋扶疎台候勝常某未有見日

更祈厚自持前有騎詔

二

某久知左右固是大門後來美器壬午之秋始得見於益州帳下率忽忽不能盡窺涯涘要略如所聞矣爾後相望眇然又衰懶之性不喜作世俗書但有馳懷今來此邦去甲舍不遠正擬為問先辱記存以勞苦之愧仄不可言

三

某不自量而當劇郡日夕愧懼不勝耳常辱貺以書者
宜有規之不謂愛之太深而忘其短過欲修飾固陋加
以溢美之言左右其誰欺乎繼此願聞忠告某既勞於
事亦思退而休息近治一室而居山之久喜山之念不
衰或傳齋座有奇石有可焚香者求一峰惶恐

嘉州知郡

此距鈴下不遠日聞休聲有不待書函往來故遂疎上
記不省台用比何如秋高尚未全清伏惟兼領二臺裁

剗有餘神明所相台候勝常未間更祈盡消息理佇觀
真賜使節

二

某幸預世好凡某之外屬則於大門亦外屬也安給事
之子某外兄奄卒益州帳下靈輜東歸行路且傷之今
道過治府願無令津吏滯留得即行使逝者早就壙不
敢忘德伏想寬仁不惟念及世好之家亦必動心矣率
爾敢言之愧仄

叙州知郡

仄間自瀘上來守邊為大府所知徼外亦當畏服涉秋
以來伏惟緩帶宴居威自及遠台候勝常末由言集所
祈厚自持前尹環列

二

某衰懶未能即通訊今正欲候食寐會外兄安制幹之
喪東歸取道治府因附其子致此書敢望無使津吏滯
留也修問而及其私愧仄

楊榮州

久別靡日不懷忽奉手誨喜審已駕朱轡行役安穩台
候勝常遣伉步以候前驅

二

通川得奉談宴未嘗不念此樂竭來益部無從為問惟
悒悒耳比見勅目知領三榮之左符不謂熊軾乃過此
邦親得舉一觴為其父老賀也館舍汎掃已併期面究

三

三榮山中秋氣計已作寒伏惟黃堂已當墮塞台候勝
常未間千萬厚自持更偃大藩

四

相距接壤而不能時通訊正厭世俗浮辭故耳其於懷
向老成正自不置也香橙西州所無特承分甘感刻感
刻蜀牋二百謾助揮染薄少愧仄

李雅州

治所號為多雨秋氣益當增爽伏惟宴坐甚清台候勝

常未有見日更祈保練前有賜金

二

某性益衰懶省視簿書罷即高臥矣不能時以一介候鈴下方切馳懷忽承惠翰拳拳之情有加但劇愧仄報道路之傳安有是哉

任知郡

林壑間已覺陽和至矣不省舍下何如伏惟冲衿粹溫台候勝常未間更祈嗇養前賜節符

二

某不勝郡寄日不暇給不能時致鄉長者咨請風俗所
宜劇懷向元正佳節也當奉羊酒以賀既不辦此禮又
未及修牋致善頌之意先承華翰相慶愧仄大不可言
春和亦可少出否併冀台察

楊蜀州

承熊軾已歸甲舍伏惟遠行犯寒得就瑾塞台候勝常
闊絕亦復旬朔懷向不可言知且燕休坐阻言集伏紙

悒悒餘祈厚自持前觀舉十五州之最

二

比見趨朝意謂諸公覩二難之高致即留漢庭今乘長
安廢車而歸千里蒙福矣况唐安乃節度府廟堂不輕
畀付當自是小則遣以禮樂大則補公卿之次矣幸少
須之

何隆州

耆仲

累累奉來訊皆親染翰開讀便如晤對也感感刻刻比

來秋氣頗淒緊伏惟三嵎爽氣日加台候勝常所告為
政一二古來良二千石正自爾耳幸不倦以終之促膝
未近千萬繕性前當振藻皇途

又

比來寒暄尚未定伏惟黃堂宜於四序台候勝常未間
千萬厚自持前有冲邁

又

某從來嗟嘆幹略左右要亦自期於古人標置軼羣凡

百不待程督也仁壽縣乃爾縱吏自今幸為深禁察之
為佳耳某慙爾兼將輸迂拙豈所堪任正望左右勉應
期會為一道率也

趙威州

真

辱書欣聞乘塞甚安尊候勝常治所接近徼外益州所
恃以為藩垣正在行以公廉則疆場寧靜矣從來守邊
市徼外物幸無然未間千萬厚自持要觀減狀

宇文黎州

塞上益當多風有寒意矣伏惟預戒瑾塞台候勝常未
間千萬厚自持前升華劇

二

治所亦復少事否徼外馴服期會無違此二千石之最
也遙想夙夜匪懈無怠于此某於一道之課自稽考焉
幸滿此意

湯石泉

尚之

飽聞治所在泉石間地勝事簡伏惟黃堂邃清尤與夏

宜台候勝常會晤末日更祈保耆前有進律

二

某為別幾年矣懷向豈可言但尋去梁山即在行役中
去月六日至此承頽弊之後短才不勝煩劇復不辦遣
一介修交隣之問先辱眷存寵以華翰感慰且忤不敢
稽留函使草具為報幸垂台亮

嵩山集卷三十九

欽定四庫全書卷

嵩山集卷四十

宋 晁公遡 撰

劄子

伏長寧

炎蒸始爾伏惟政成將歸父老挽留台候勝常未間更
祈厚衛前偃大藩

又

某相望有山川之險雖休聲日聞而書問良簡乃情馳
向其何可言先勤眷存貺以名酒精鹽感愧尤至也蔗
糖五十斤恐食者須之輒致鈴下非足為報也

又

伏惟功在盟府著矣固嘗總一道之戎剖大府之符向
來暫屈守邊議者以為不稱今承報政而去計朝廷已
書贊佇當馳賀熊軾莫且歸益州甲舍少休否取道於
此敬潔豆觴以待

任提宮 希旦

近在郊墅不時聞動靜懷向可量一雨頗解煩鬱伏惟
高臥北牕台候勝常未間更祈厚嗇前復起家

又

山林臯壤與城郭不同其為清致足以慰愜高懷視區
區於簿書塵埃間者當亦憫笑也何時一來郡齋快聽
名言臨紙馳繫

又

秋來廬下益覺節爽伏惟宴居甚休台候萬福未間更珍嗇前有軟輪之召

又

比承至郭下忽忽僅舉一觴都不盡兩懷至今為歎杖屨何日復一游乎延佇延佇所喻悉施行矣

吳永康

洵

別來日月推遷秋復垂盡環城皆山朝夕多風已當有寒意伏惟班政千里台候勝常未間千萬頤愛更典劇

州

又

遠承修敬之意洋溢尺牘感愧何可言山氣計已知秋
伏惟台候勝常未間千萬厚自持前上亭衢

又

某每相程督非是迫感長者王事不得不爾左右為郡
而忘董攝其屬則一郡廢耳必亮此意所應會期者更
為宜懷自今悉如最條則不復憶有此州矣

簡州王倅

為別未幾不省起居何如伏惟歸及燒燈與民同樂閨
庭歡豫台候勝常未間更祈恬養前踐清途

又

某敝邑兩勤左轡臨之賴庇厚矣近已得請於常平使
者許以管鑰付監郡掌之敢望授皂隸以歸忽忽不能
盡所懷

又

連辱手示欣省履此淑節台候勝常未間更祈盡消息
理前嗣大門之官

又

蕞爾地屢勤程督愧仄上供綾絲錢更發千緡今以綱
解往不省虛額事作何等狀返報乎左右必有以貺敝
邑也幸甚

又

今日發郵橐得來翰欣慰并深春事已半伏惟官餘亦

足以樂台候勝常未間更祈保甯前搏扶搖而上

又

敝邑困窮幸明詔議除給軍抱虛之錢微左右孰能成德意而救此邦哉示諭當除五萬餘緡幸甚幸甚願言不足致謝要使邦人社而祝之

又

比已遣人上記今日辱函使臨之感慰并深春事繁興伏惟樂此芳時台候勝常未間千萬保衛前授超階

又

敝邑不能應期會一一為上臺憂而勞長者程督愧仄
愧仄上供綾絲錢蓋用田契所收此寧可急耶已趣屬
縣矣有公移持上併冀照亮

又

某不為上臺所信重勤左轡再駕跋涉亦良勞矣豈可
臨發輟更不舉一觴乎萬望迂臨不然將有以督過之
否敢望台察

又

某比已專介奉記薦承移文以所考覈為上臺所卻重
勤措懷愧悚愧悚今遣主者吏并具案以往伏幸台照

邛州蒲倅

比得泥軾過之獲談宴者一再但尊俎蕭然為媿耳竊
計已至治部叅懷教條百姓已有邦國不空之歌矣共
惟白鶴之山爽氣來集宴處甚恬台候勝常某日日偵
視印章欲為賀今日家嫂之弟衡正雅之官夾門敢先

通此記更望庇存其人使有大厦之依也未間千萬保
嗇別有尺一之除

又

別後時移節遷遂見秋杪來書稠重良戢至意因審比
來台候勝常郡無太守上綱正當行其事事豈有難者
但少垂神董攝封內自應趨令所諭已為施行未間千
萬厚自持佇期仗節撫藩

蜀州袁倅

天高景徹氣體宜快伏惟寢食復初台候勝常未間千萬厚自持前刺大州

又

居官無它惟不失王事程乃不負縣官耳承小失適而能不忘其職果踐此言良副所望也官餘更宜親近藥物善自遵養為佳

又

歲云暮矣伏惟叅懷大府之政神相賢勞台候勝常未

間更冀善調適前登神州奧府

又

某日益衰懶公事外惟靜坐耳遂忘長者都不辨時致
問左右精力絕人裁剝之餘尚能相勞苦更分九轉刀
圭感刻不可言偶有丹砂并蒲墨二漫塵几棊非足為
報恐須之也

又

某為邦僅能了繩尺碎劇不大乏興耳每辱來牋不有

以敦厲凡薄而飾獎過實何也讀之但增惶悚

又

承喻皇甫甥質物已令贖還付函使矣迫節多事所欲言者無窮而臨紙吃吃不能盡吐之幸照亮

嘉州何倅

歲暮九頂之氣不泫寒否伏惟叅懷多暇台候勝常未間千萬保書前憑熊軾

又

稍不聞問良劇馳思邇來治府歲會當已趣辦為一道之最別駕之功多矣衰懶愧不能追惟有絕歎

又

歲事便已道盡東風已解凍矣伏計中和之氣多於他邦冲衿粹溫也未果以一番為賀先辱手誨感佩重勤無以寄言黃柑百枚漫往可以薦柏酒併冀台察

又

宋景文公文章稱一世向來在益州紬史時左右裁眉

奉斫削當日稱其風流公能刊正其集舉以見貺讀之
想見其勝味也感刻感刻

又

某比已作報矣今日又承寵問欣聞比來刺史咨仰神
相賢勞尊候勝常未間更冀厚自持前有最賞

又

某視事再浹日尚未知為政之方而於風俗亦未悉也
鳬鴈頃在此良夕宜有輔其不逮而告以未聞何為稱

頌之言吃吃不去口非所望也凌雲寺謾為作詩何足
塵滓山中之石耶女夫移試事荷歷意感刻

又

即日秋陽堅此百穀伏惟嘉歲之美台候萬福未間更
祈盡珍重理遂開宣室

又

乘軾車往漢嘉蓋踰年矣丹稜之民未嘗不東望歎息
不得被愷悌之澤也漢嘉父老不知何以報別駕之功

耶

又

承將解印組遂建蜀檣如吳下可謂釋奧溲升本朝之秋也某衰懦聞之竊壯此舉而稱快願亟進道佇觀騰翥

又

某治郡殊不進每念不得左右為之助宜致此耳承欲過此而後東雖向來不獲言集某尚冀聞英偉之論於

一日之間以洗衰陋亦幸也貽書稱頌不敢當不敢當
瀘州何倅

天氣便類炎月不省泥軾始休起居何如伏惟一郡矜
式神明所相台候勝常未間更祈厚自持前有璽召

又

某聞英名甚久比在廣漢始見風規而觀為政殆有過
於所聞惟恨不獲從容接辭耳某近來此邦才短不能
任劇初視事而左轡過之不克挽留為一日之歡愧忤

蓋至今也東向可勝邑邑

又

某比見王瀘州高明磊落人近世未易有也左右平日
抱宏偉之器今想一登其堂分投氣合歡然如笙磬矣
敢遙為其邦人賀

又

某恃同臭味甫通一牋輒有請於左右家弟公退為外
姪孫知錄以三百緡買田於瀘川未成券乃為孫知錄

姊婿林子質錢二十千於林蒙之今為大府拘償蒙之
冒官所請奉稍家弟欲以其田復歸其業主取二十千
納大府餘送家弟所不省亦可聽否率爾謁其私愧悚
愧悚併冀台亮

方通判

近自函使歸上記不省信後台用復何如伏惟邦國不
空民獲樂歲神相善政台候勝常某末涯瞻承更祈厚
頤前刺大州

又

其間往來者言治部稱頌別駕之功滿道上已有預畏
其去者不知區區一州何足久留叅懷耶某來此已八
告朔屬當修護城東隄須竹歲往市之封內而苦津吏
算緡某辱與左右雅游而深識仁明愛此邦猶其邦也
所望矜聽不勝至禱

嵩山集卷四十

欽定四庫全書

嵩山集卷四十一

宋 晁公遡 撰

劄子

李通判三幅

喜聞泥軾已還伏惟跋涉良勞台候涉秋亦復勝常行
須瞻謁

日者始得一見固有中州之風氣甚慰落南之念也觴

豈不足盡意何辱謝焉愧仄愧仄

歸舟莫可少留不比向來忽忽否甚欲舉觴劇談乃為
快也初不知近止不及為問致勤手筆先之又有坐客
不即修報併增慚悚幸加亮

趙通判

連辱手示感刻感刻秋天益澄爽伏惟左轡將駕台候
勝常三復來諭敢不知雅懷已為再稟計庭不遠旬朝
爾事未允者更為歷意未間千萬保壻前趨遠大少償

期年不振之恨

又

雨止有相之道伏惟與民同喜尊候勝常未間千萬保
齋遂乘泥軼而歸

又

公之屈就於巖邑每為嘆嗟昨日得計庭符許還州端
想烏牛之下父老已辦歡迎于道也示諭道路之傳安
可信乎過承溢美之言不敢當

樊通判

辱手示欣聞比來台候勝常相與享野人之養正當治
野人求有以稱之乃無愧耳諸訟牒能為措懷略皆決
遣良所望繼令無怠幸甚未間千萬厚自持自試一州

高通州

遠辱旨信欣省秋來關掌郡事台候勝常端誠近出因
相過殊從容甚念不得同觴酌也瀘上今秋亦善收否
未間千萬厚頤前建幢榮

何通判溫叔

治所今夏不閔雨否伏惟膏澤以時煩暑自清台候勝
常某已十四告朔去日亦不遠矣居閒食不足從事力
難任深有此歎也外屬种彥遠彥遵李安中比於德宇
曾通謁否區區末由面言更冀厚嗇前剖左符

二

某遠寄益部相距便不啻千里之遠書問不時每以為
愧近承手誨乃審淑德之配不克偕老遙想撫存悼亡

何以處情不果即以弔今則不及哀矣慚仄何可言
惟祈抑損無益之悲以道自照幸甚幸甚

李簽判

牛刀匣而不用幾彌年矣今得一邦佐刺史恢恢有餘
地殆不足盡長才天下固多盤錯公朝豈容利器置閒
處耶

程省幹

久不通訊忽辱來翰欣省已履春端尊候勝常未間干

萬保魯前登華近

二

令弟去十二月已順流而東矣養堂在此甚安或有所屬可垂諭也某來此忽已旬朔顧得充位者賴外太府羣賢比存之耳幸甚

楊判院民極

近得瞻晤殊怱怱曾不得再舉一觴至今惘然辱手示欣省已休里舍尊候勝常未間千萬厚自持前趨大昕

之朝

又

某承報以仁壽公沂公而來甚荷當即遣書候其次舍也高軒仲月再過此向來兩懷不盡者當併寫之

又

行李久出遂休舍下溪谷之清足以偃息尊候勝常未間千萬自厚前膺廟堂識察

又

某來此但知文物之邦耳今承示以考載先賢事迹山川主名不待杖屨所至粲然在目左右博學洽聞如此某一年初未得之愧仄何可言三軸復授僮幹一軸須摹寫入石也許自隆州過我更期傾倒所懷

史主管

近已遣步吏上記不省台用比復何如瓜已可削伏惟計庭每事詢仰退奉養堂居處宜夏台候勝常某末由趨詣更冀澡練神明遂升清途

又

某迂疎而為此喬木之國日虞曠瘼不獲以理去始則大懼而繼以喜也執事今在重部必如仲尼於魯豈嘗斯須忘之耶果蒙分以鹽筴不啻飢人之得壺飧也敬以拜貺某自今亦不敢不勉春季綱已盡起夏當餉軍前者亦繼遣幸寬憂軫無煩遣人程督幸甚

又

比辱高軒臨之愛其粉榆而施及衰朽幸甚幸甚乖濶

又復幾月方切馳心先承手誨感愧大不可言比來損
爾寒伏惟神相行役已還臺下台候勝常某為郡非所
堪正為祿食耳賴此已及期年更冀終憇之也三書今
致之文房未間更祈保練前有翹車之招

又

益州風氣不至炎鬱否伏惟主公詢仰事就清簡台候
勝常無由詣見更祈怡養神和前有崇委

又

某為郡不進日苦空乏至煩計庭憂之分以鹽筴微公
之力不及此豈可忘厚貺哉既辱比之矣更望保惠其
終某亦不敢懈以為左右羞張興已隸尺籍如台諭併
垂台照

又

太夫人壽履康健嬪息均安老妻兒女曹附問比恨不
果率爾求見爾此有委幸不自他

又

比日不省益州氣序何如伏惟經調已定神相燕休台
候勝常某賴庇甚厚庶幾可以飽微祿至理去矣女夫
薛純志猥預試闈薦名尚未得計庭帖敢望早為給付
去騶幸甚未間更冀厚嗇前登端貳

又

某計此部浩穰不敢頻以書干聽下以妨裁剝不省台
用比何如數日暑特甚伏惟計庭詢仰神相其勞台候
勝常某酒本如所建白賴庇多矣連奉施知縣處三書

感慰不勝道所諭二事悉遵承也未間更望厚顧前位
通官

何制幹

某懷向盛德靡日不勞但無事不敢奉記恐妨帳下籌
量而為染削耳即日甚暑伏惟大府尊嚴退食多暇台
候勝常未有見日所冀調適前升通官

運司屬官

比日敢問台用何如稻苗得雨膏沐氣亦清潤伏惟從

容計庭一道蒙賴神明所相台候萬福某得以短淺充
位于此寔自庇存幸甚未有見日更祈持精養神前上
赤墀之塗

二

某便道之郡不得至幕下瞻英表而聽至論有所矜式
而來大為惘惘姑奉一牋抒此意左右為迂覽可也伏
蒙答教勤勤懇懇巡屬主郡吏乃得眷顧如此之厚感
佩之中不知以謝

李檢法

辱手示欣審比來尊候勝常未間更祈厚自持前究者
艾之福

又

渝上之別久矣比在梁山常奉來告忽忽作答自爾不
能嗣音每有馳懷不謂羈旅少城未就官次朋友共為
稱屈所須一騶敬如諭瀘南書不靳但恐無可相處而
某之言亦不足為重耳更試籌之繼以飛報

又

已履春端伏惟翕受始和台候勝常某恨不得舉栢酒
為壽惟冀以道養性前膺軟輪之招

又

某近因來幹歸上記并付廩直計已通覽矣某近准常
平司遣官來封閉諸倉收其管鑰逐年以新陳充支官
兵至十月開倉即撥還今如此即日軍兵無支矣兼貧
乏乞丐米當至三月而止奈何已請於使者因白事為

言之幸甚

何運幹

伏計騎從者已至刑臺館舍少休台候勝常某末由良覲所祈厚自持前升木天

又

某始視事不得至計庭無因一見英姿但嘗率爾以書代面愧仄何可言比審奉使者印綬至嘉陽敝邑實通道正喜幸將遂承教接辭以慰夙心不謂便道取疾不

獲使館人爲一日之衛瞻望莫及悵然至今輒有賤事
當建白別具錄子敢冀矜察

楊提幹

天地便有慘懍之氣不省舍下何如伏惟肅駕將行尊
候勝常未間更祈厚自持前上亨衢

二

某每念高才不應埋光里巷比聞廟堂識察俾佐常平
之政漢中蓋重部也自茲其遂軒翥乎此未足賀當繼

以賀爾

三

比辱至郭門屬某方弛擔都不得劇談至今為恨未就
道間尚能相過更盡從容之歡否佇俟佇俟

王制幹

春王三朝不省起居何如伏惟舉柏葉之觴以介眉壽
台候勝常未間千萬保嗇前踐世官

二

向來至益州不得數詣字下但如瞻孤隼於秦華之峰
稱快而已既歸理積事且應歲會極忽忽不能為問獻
歲亦復無一牋方切愧仄忽辱手誨感慰不可言也

三

示諭先敷文公有當得任子者視諸故府得其狀再為
論之天臺矣伏幸台照

張省幹

初未聞名迹忽辱手誨知己居倉氏之官邇來尊候何

如夙夜勞乎長者為貺爛然溢目愧不足當也未間千萬厚自持前膺明陟

閭機宜

遠勞一騶趺足來貺以書并示麋角感感刻刻麋角之岐徧者是也如此類東西川亦有之復付夾騶試求之漢中不審可得否山南氣序今當已寒伏惟尊候勝常家兄所領地大且重正須賢者為賓佐今段之舉可謂得人矣相望益遠千萬厚自持即改中都官

嵩山集卷四十一

欽定四庫全書

嵩山集卷四十二

宋 晁公遡 撰

劄子

郭運幹

中行

辱書欣聞比來尊候勝常承送中郎至廣漢正當爾耳
某衰拙豈能更任漕輓幸有以佐之未間千萬厚自持

史主管

非請事不敢數以書煩裁報不省台用比何如白露將零伏惟計庭每事詢仰酬酢有餘台候勝常某賴庇尚爾安位末由參詣千萬保嗇前上赤墀

又

某來此忽忽五告朔免汰遣者保持之力也感感刻刻承內屬尚有留粉社中敬如手誨遣十三騶詣舍下矣併乞台照

又

三朔肇建伏惟膺此百順台候勝常尚稽言集更祈適
神積精前踐台牧

又

近承騎從者至郡庭都不肯小駐同舉柏酒忽已發春
咫尺不遑賀於堂上惟遙伸善祝爾須供帳等並付來
騶伏幸照悉

朱宣幹

知為益部大家而未得瞻承為恨此部蓋如崑崙所出

必瑰奇何尚爾淹於外太府耶

孫洪雅

相與雖同益部便有山川之阻渺然不多通訊每劇懷
向非不能日遣郵正厭世俗以書疏為謬敬耳今日忽
奉來翰開讀如晤言欣快不可名也邇來歲會已辦邑
服教化宴居無事何不若帳下尊候勝常天下每患無
才有才如良臣而識之者少然則非無才也可勝歎乎
譚季淵為人如此今之時豈能容之當為作傳顧季淵

何藉斯文要豁吾黨憤悵之氣云耳所示訟牒此良臣
餘事使立於朝寧止於是耶何時胥會臨紙鬱鬱未間
更冀益養剛大須有用時

鈞奉節

春流尚穩伏惟蜀柁西歸喜見喬木尊候勝常未間更
祈厚自持前嗣宗職

二

某向來在夔部休聲凜然不愧先府君令承外銓推擇

以奉節相委重自此當奉最必不陸沈於州縣矣惟拱俟之

三

某去硤內久矣每懷朋舊忽奉來翰并示智師諸友書便如晤對喜見感刻知行及津下佇期披寫

史靈泉

畢

風欲解凍不省治所氣序何如伏惟行遂勞農神相善政尊候勝常尚賒晤對所祈養恬前被綸墨

二

某樸直之性而當風俗媮惰之久遽欲以古道行之其為不悅者多矣顧嘗佩服孔子之戒要使鄉人善者好之不善者惡之不敢憚不悅者改其所當為今辱貽書稱道云云左右真所謂鄉人善者也念之感刻何日飛舄一來慰此翹企

程大邑

雲

累承通記皆是申論其職官居不當爾耶邇來綱目已

舉否疏理弊源而得其要亦是一適伏惟尊候勝常人
所愛者利與名耳小人則求利君子則求名者足以照
映天下而遺光及於子孫左右學為君子儒計必知之
不待告也未間千萬厚自持有以出於流俗之上富貴
自來逼人

虞火井

比來眠食何如所報宣樞已入境具知更有聞無靳垂
示何日赴治所邑下正須撫字宜副其望

王導江亢

承飛鳥已至治所四向皆山今當殊有秋意伏惟尊候
勝常未間千萬厚自持願觀最狀

二

治所久無令君父老幾禱於社求之左右能惠顧之必
有以副其望某平日聞王能南極口談方正今治此藪
爾地計不足為也長牋特世俗禮耳要相期於世俗之
外願言勉旃

石溫江

知綱

省告欣聞已至邑下尊候勝常未間千萬厚自持即上
課最

二

府縣皆沃饒易治也來書何為有懼乎為政無他巧以
公勤廉清行之則不勞而舉矣長者更踐為多豈待教
告耶

張名山

英仲

承已佩銅章山中亦易治否涉此凜秋伏惟尊候勝常
未間千萬厚自持佇觀舉最

又

尚未識風儀然平日預尊太君之游其源清矣知必不
凡也百里之地姑為發輟願言勉旃以趨遠大長牋為
貺溢於稱美愧仄愧仄

宋嚴道

辱書欣聞高秋尊候勝常民之負枉甚於沈痾須得良

醫瘡之故比數以訟牒相付幸體此意使民無冤幸甚
未間千萬厚自持勉應最條

施彰明

飛鳥復至邑下伏惟尊候勝常未間千萬厚自持益務
在公

又

承前以紛紛之言而去今始復還治所書不云乎百姓
怨汝詈汝則皇自敬德而況人臣宜如何也幸行之以

忠恕無加忿嫉則民皆悅而服矣

張依政

承以課試諸生程文及收征調斷訟牒者相示甚善為
邑不當爾耶不必勞驛隸朝夕致之也自今邑無枉負
之民事無期會之稽即具知治狀矣惟冀不倦以終之

郭新繁

辱書欣聞比來尊侯勝常所諭賞格已具為狀付來騶
也百里之內以左右為慘舒凡百經懷乃副民望未間

千萬厚自持

王陰平 守節

封內氣序已有寒意否伏惟初政勤勞尊候勝常未間
千萬厚自持別膺簡授

二

比承來問寢門乃得瞻晤恨談集不數數然耳違濶復
爾許日懷詠何可言遠辱手誨併用感慰

三

治所號為少事亦易治乎大門為世吏師必有其法推而行之足以稱最矣願言勉旃佇觀諸公交論薦之章

張龍安

山中天氣早涼伏惟得百里地而治之尊侯勝常未間千萬厚自持前大其門

二

某頃與尊太君游雖未識象賢知當有典刑也遠承手札不忘此好辭氣要自不凡三復感歎但衰鈍無以為

故人子重愧仄何言

黎彭山

已飲柏酒伏惟翕受春和尊候勝常未間更祈厚頤前
上最課

二

比承到郡庭忽忽不甚從容接辭為恨不見屬耳居處
何如邑事亦可治否更冀勉旃

三

長牋為貺既知食馬而急事有殃必與不知此戒者不
同老守所望也自為答愧不能細

蔡綿竹

遠辱手答使從者足繭為愧也已履春端伏惟飲此柏
酒尊候勝常未間更祈晉和養素超居方任

二

某遠承錄示韓退之盤谷序及蘇子瞻諸賦皆為之譜
得使謳者歌之當舉酒遙相屬不敢忘也九丈詩薛倩

讀之有十數字未刊正今往併冀照悉

吳青神

紅花堰一邑之利左右能為民竟此事殆宰物者舉以
相付居官難遇是也長牋偉麗不若見於其政更為勉
之

祿峨眉

東之

適承過訪始識風儀貺以五詩何以堪此慕用之誠今
之世文勝矣左右之力有餘於文章更見之於政峨眉

自杜子春去網維便頽敗有以釐正之使談者稱左右亦如以文冠蜀士時乃所望也盛意不宜虛辱欲攀和則又相與為文勝耳幸照亮

張彭山

辱書欣省涉秋尊候勝常邑事承歷意郡庭所望也比屢有民訟更可疏理無令稽留使胥吏上下其手為佳耳未間厚自持前有彙征

唐資官

久不相聞不知近在資官辱書欣聞比來尊候勝常未
間更祈自厚前膺最賞

二

公滯小宰之選久矣絃歌一邑亦復樂否所諭治鹽課
有所逮已下青衣追人付縣幹也屬往視堰作報不能
細幸照亮

孫知縣

相與地犬牙而書不能時往懷向何以自寬耶辱手示

欣省春來滿縣花不減河陽尊侯更當勝常嬪息均安
淘江直從邦人所請姑分水勢亦如九河耳父老謂六
十年前嘗為之今甲子一周殆有數然重勤開諭益歎
遠慮也譚季淵傳久已成今往小出視通濟堰作答極
草率幸照亮未間千萬自重會有昂霄聳壑時

李知縣

方念不知涉春狀辱手示欣聞尚留益州旅食安穩未
間切祈自厚更有赫赫之授


二

比承忠告輒罄所懷言之亦孔氏之門蓋各言爾志之義也外選推擇以石泉叅佐相委重此邦行當不空矣其如青衣父老何某定用十四日至堰上能同按行為佳

張知縣

南畝正皇皇望雨連日大霑想與民同喜伏惟居高受涼尊候勝常承告以撫字催科兩勞此老守之幸也利

州比較之期甚迫更為趣辦為佳聞嘗小失適亦當平
矣未間更祈厚嗇前觀公朝論最



嵩山集卷四十二

欽定四庫全書

集部

嵩山集卷四十三
七至

詳校官起居注主事臣顧崇泰

主事臣呂雲棟覆勘

總校官進士臣繆琪

校對官中書臣王家賓

謄錄監生臣胡念祖

欽定四庫全書

嵩山集卷四十三

宋 晁公遡 撰

劄子

眉山王尉

辱書喜聞眠食平勝比承以親疫遽歸今遂良瘳殆是
純孝所感更少留無傷也為此付幹人恐欲亟得報

丹稜陳丞

辱書知己視事必能副封內之望上下欣欣伏惟比來
尊候勝常厯書已如所諭批上矣州之征調皆自邑出
更為勉應期會無使郡庭負課殿乃幸未間千萬厚自
持前膺察舉

郭縣丞

比聞去邑下甚相念今承惠書知己休甲舍氣體和平
殊以為慰比來伏惟尊候勝常今日州縣誠未易為乃
能超然人外疾源自當除也所諭印厯皆具書其考矣

未間千萬珍賚以究安閒之樂

趙縣尉

辱書以元正為賀此意厚矣感感刻刻伏惟履茲上月
尊候勝常邑中逋租比殊不入何也來翰諄諄浮於實
者多惟勉副所期待則佳耳未間更祈調適前膺周令
慶賜

又

辱書勤勤懇懇不敢忘厚意比來起居何如所諭當示

常丞也古人去如始至更勉旃未間萬萬保齊前有光
除

又

連奉來告欣聞與令君中分而治之公事良勞尊候何
如比相煩覆視田訟等數條久未報切更歷意正當盛
年富貴要自致幸勿怠通鑑煩印五帙欲亟得之未間
更祈保練前膺親親用賢

常知丞

辱書喜聞涉秋尊候勝常所致緡錢諒勤歷意使郡庭
不失期會而負課殿非大邑尚誰望然此歲課尚虧已
有移文去便為繼遣待此以行也他日最為屬縣最敢
不察廉未間惟冀厚自持勉事斯語

程推官

某久不接辭故設飯相輿致豈為樂飲哉乃承以在疾
為解無乃外之不使豫門牆雅游乎千萬見臨

又

遠勤管翰更相見存因省秋來堊室安穩承襄大事近
在今冬計亦勞止深愧無能之辭不足為幽堂之光如
何未間當深寬割

又

辱手誨具審邇來服舍安穩見示所刻銘文以求虞殯
之歌敬以一章以寫先德愧筆意短淺耳未間當深寬
割

張監酒

秋氣已覺高寒惟行道安穩尊候勝常未間千萬厚自
持前進清秩

二

辱書開讀情辭溢於誠外但增感愧非所宜堪也作報
不盡萬分幸照亮

三

執事出於通官之門不應尚爾困於州縣乃承不屑麴
蘖之間而欲為之此職豈足相溷况累年酒政大壞其

虧以數萬計主者已罷奉錢其一以拘留監納所虧錢
矣無乃不知之乎執事果能任其責否不敢不告

杜文學

承手示欲歸廬下無不可者何時再來尚期言宴

唐縣尉

今日又辱手誨諄諄盈紙衰朽殆不足當此意平生本
無當世意為貧驅之出既食其祿不敢玩歲愒日雖自
謂無愧然知之者誰哉左右推之使及於前輩則非也

承郡庭以邑事相付正可為斯民出力簿書頗敗想勞料理眠食何如未間切冀踐言副所期待

李節推

不相聞久矣豈勝馳懷夔門人來知己視事帳下宜膺察舉伏惟慈闈增喜嬪息均安尊候勝常大帥康健否某來此已旬朔幸不致乏興但觸目無朋舊回視硤內殊惘惘也何日會晤更祈保調前改中都官

呂主簿

相望不同州部音介便不可通惟有懷詠耳辱手示知
已去百里之地外臺舉最要復付以劇邑少留謁舍以
待推擇尊候何如某於此已期年王逸少所謂更求會
稽便自邈然預憂無以續食也所諭樊君今得其報以
往未間千萬厚自願前升常伯之銓

候將

天氣寢有暑意伏惟列屯烏牛之下宴處清佳台候勝
常未間更祈厚自持前尹環列

二

某比取道漢嘉特承遠至江干始識熊豹之顏固已欣快且念行路之人何以得此益增感愧蓋至今也

三

某此月六日視郡事短才殆不勝任方懷愧懼忽辱函使臨門寵以過實之言顧不足以堪之耳自力修報幸恕漫略

王縣丞

連辱來告感慰并深伏惟東載就道尊候勝常錄子之言溢美矣衰老良厭此語每念是邦積漱願相與條理之乃幸也未間更祈厚嗇前膺最賞

宇文縣丞

治所在此部號為佳山水處伏惟涉夏以來無復煩蒸尊候勝常未間更祈厚自持佇觀舉最

二

某頃豫先府君之游辱知甚厚去九月始見象賢知風

骨不凡盛德之後其益興乎為之悲喜但恨忽忽不得
欸耳遠承惠書不忘雅好此意則至矣其如稱譽實不
敢當

劉監酒

相別久矣都不通一番之問惟有馳心比來伏惟尊候
勝常陸沈糴粕間乃爾久耶諸公果察廉亦少償其勞
也未間千萬保嗇前進中都官

蘓知錄

辱書欣聞邇來尊候勝常汲汲於進者士之常耳俟採
聽風聲有狀即奏論幸更勉旃未間千萬厚自持無忘
東坡公之大節

李縣丞

松

辱書屢矣每求論薦為言幸以職事相求不當求以尺
牘也邇來尊候何如未間千萬厚自持使政迹有聞

李縣尉

遠辱長書申寫所懷并聞已歸膝下尊候勝常先府君

實與有連恨不識之象賢如此可不論薦所冀更加勉
勵以大其門

王縣丞

得所馳翰綿絡累紙敢忘重勤秋已過半伏惟尊候勝
常某益厭浮語而喜聞休聲願言留意於此而無事於
彼也未間勉膳以須論最

楊主簿

來牋爛然修部下敬感感刻刻所以論薦者正欲相勉

向公耳無負所望比來眠食何如涖官甫爾凡百不可
怠要自今益更洗手効職為佳未間千萬厚自持以事
斯語

何推官

累辱書翰勤亦至矣左右所居官當督錄諸曹郡庭事
多未舉能為毗佐而疏理之誰不爭論薦也邇來伏惟
尊候勝常未間千萬厚自持佇觀治狀

張縣尉

辱書承已至尉曹適來伏惟眠食安佳長牋之禮雖不可廢自此無事於文可也治所鼠竊為多左右以逐盜為官幸為寬懷使桴鼓不鳴乃為稱職未間千萬厚自持勉應最條

杜縣丞

長書陳義甚高比嘗相從於通義兩懷曲盡矣何必爾耶因審比來尊候勝常此部十六郡而縣又四倍以上求論薦者為多勢不能徧及惟當拔其尤以勸郡縣耳

左右未有聞於人又未有效於本司宜更自激昂也未
間千萬厚自持

夏縣丞

貽書甚厚感刻感刻知為計庭所知付以臨邛易鹽市
絹事此美意也何使君不能竟之左右果能辦當為此
部丞之最矣今在行李中伏惟尊候勝常未間千萬厚
自持宜以自表見於時

王縣丞

併

承已休駕適此杪秋伏惟尊候勝常未間千萬厚自持
無忘世業

二

比過邑下市道亦闊然郭外皆沃壤居之不難治也正
當佐其拊摩其民乃不負丞矣長牋之禮愧不足以堪
之

王司理

辱書欣聞比來尊候勝常長書引喻甚高其詞亦哀聽

者孰不動心焉然論薦之法非可以僕僕而請也幸勉於職業煥然有聞敢不察舉未間千萬厚自持以應最條

賈主簿

辱書知己至官次比來眠食何如簿書邑大事也南朝名賢手自注籍不敢忽如此願言勉旃佇須舉最未間千萬厚自持

李清叔

賢從子遣人來示所貺書感感慰慰治所近益昌秋深
亦有秦隴風氣否伏惟台候勝常白宋瑞今日有書至
云閏七月二十日就道及南浦則遵陸計其日須歲暮
可到郡庭幸且為父老留也賢從子行為刺奏未間千
萬厚自持前賜刺史真符

嵩山集卷四十三

欽定四庫全書

嵩山集卷四十四

宋 晁公遡 撰

劄子

張待制

某去鈴下已旬朝不省台用何如歲且更始恭惟坐撫
列城純用德教神明所相台候動止萬福某無緣奉椒
酒堂上惟乞持精養神遂究台相遠業

二

頃聞冑冠風采凜凜甚高願見之無由比以事至統府
但得陪賓隸之後足矣重蒙召至尊下酌酒飲之從容
劇談皆經世之要老耳未之聞也其何幸似之恨不可
久侍公座忽忽而去至今悵惘

三

某坐念吉月布和不數日間宜修巡屬之賀非賀節下
蓋賀斯人得公如萬物欣榮於春也天子於此時當行

慶賜佇聞璽召復立九德之朝向來用之未盡者於是
大設施之蒼生幸甚

四

某道中伏讀諸公所錄元城先生立言行已之方為士
大夫要當如是耳但其間所書鄒忠公疏云膾惇之肝
者乃蔡懋偽造不知何故不深考之也節下既以此書
見賜某敢不如元城先生之立言比嘗論鎧甲事不省
可行否更思宣撫司須牽馬人小邦當十五名與涪忠

諸州等別具錄子申論併乞台察

范運使仲南

某迫於事不得久留節下敢問台用比何如風且解凍
恭惟中和之政洽於一道貨通財阜神明所相台候動
止萬福某謹奉墨牋以修下吏之敬惟乞步趨實下前
膺圖任

二

伏聞盛德之容粹溫而剛大甚有似忠文公願見之日

久矣厥路無由比賴天相之以事至明臺得趨謁於前
已大欣快乃蒙再賜坐語教載而飲食之所言皆足垂
世誠如拜忠文公也至今拳拳服膺若在齋座幸甚幸
甚

三

某惟履端之月於易為泰蓋君子在內之時敢以為恩
公賀軟輪之來匪遠也念不得與賓隸面致此意顧寓
之一牋言辭淺陋不盡所懷伏紙愧仄

王總領_珪

某為沈公出選夔部兵道中兩奉手答欣省涉冬台用
休暢歲律垂盡恭惟餽餉流通軍飽民悅神明所相台
候動止萬福某已書吏考更閱如是日即辭滿矣行伏
田畝無由叅詣仰乞恬養至和前究經世之業

二

某邇來愈覺榮念灰冷不願當途知之非是以此為高
蓋今之貴人正如東野畢之御馬耳兼賦分窮薄縱欲

掀舉之反成齟齬向來得夷陵良坐是也來夏定求祠
庭之祿漸謀林下窠窟家弟亦來相約投老不可更爾
乖離要須對牀眠最為上策遠蒙送以前漢書嘗見此
書中梅福因上書不報乃隱去其時果可上書不須隱
去可隱去不須上書也恩公以為如何

甄以道

某平生相遇多在行李中雖談宴不大從容耳比至和
門乃連日夜獲淵對由來未有傾盡於此時也至今慰

快殆感藏於酒炙淋漓之外因遣人奉此牋為謝幸亮其略

王文甫

某比犯寒而來非所樂所樂者見公耳公似以一觴不及舉為恨某所得蓋在一觴之外感慰至今

任似

某別十餘年而得見見又止於終食間耳牢落之懷其何能宣寫違濶來每思勝味如所酌旨酒嚴而正也感

刻感刻月忽建寅伏惟計庭倚賴神相阜通台候勝常
某暫休行道之疲而簿書已堆旁矣須無能之辭未暇
錄餘惟厚護前登玉陛

石監稅

辱書欣聞比來尊候勝常承不屑關市而肯一來吾夫
子之於仕固嘗不擇而要各盡其職會計當與牛羊茁
壯而已耳長牋三復麗則麗矣更冀行顧其言以副所
望未間千萬厚自持

張司理

辱書知已領決曹伏惟休舍以來尊候勝常永不忘通
川相從某亦追念先太君為愴然左右幸思立身之孝
無曠其官以慰九原未間千萬厚自持願觀善狀

楊監倉

薦承手示欣聞邇來尊候勝常左右有志於世而思穎
脫於小宰選中願使某有聞不必累累勞音介足趺也
未間千萬厚自持

向邦輔

正爾遐想忽瀟上致所貺札翰忻感彌深因審鼓枻半
道受臨江守符以歸雖未賜輶傳識者未快然免遠涉
江湖它日熊軾赴鎮便近亦佳也何為不一來劔西乎
即日秋氣已清伏惟懷綬優游台候勝常某期年於此
初無可紀為愧有可告語否末由良會千萬養志和神
繼膺君遣

范監酒

近間伏惟涉此炎夏尊候勝常承已釋酒府之煩未為
諸公挽辟能一過此乎良深延佇或須人當遣往幸亟
開諭未間千萬自厚前進勇爵

李縣尉

長牋之貺感刻感刻具聞邇來尊候勝常衰譜系見示
知先府君不忘自出乃爾也改截會牒即如諭未間千
萬厚自持益大其門

楊司法

某二年言集公實助我臨分殊為惘惘重煩遠至郵亭
若不能別者相望渺然尚能以書相問尤增感刻也即
日氣便暄淑伏惟尊候勝常某朝夕即西上此去益修
阻惟冀保練前有九遷

馮都監

辱書知總尺籍於此得同王事必能助我者甚慰甚慰
比來伏惟尊候涉冬勝常何時啓行未間尚祈厚自持
前進勇爵

張監稅

太昊已啓東節伏惟喜此清淑尊候勝常未間千萬調
適前觀論最

二

連奉來札感感刻刻果用何日就官次此職領市廛郡
庭仰筭緡其用乃饒公出於大家標置會當軼羣自今
府庫之入不乏矣他須面

史頤老

某政事不修不能致陰陽之和乃爾旱暵民是天民天
自應恤一雨救其焦枯正與民同喜耳辱詩歸德於衰
朽不敢當也復用韻為謝尚期至郭下併面究之

楊天祐

即日暑未退席伏惟林廬安居尊候勝常未間千萬厚
自持

二

固常聞從弟有在沈黎者壻於鄉長者家某貧不能合

宗族而食知左右之賢可依蓋甚喜因循未果為問每
馳懷遠承手誨語及此好慚感不可言屬郡事少閒亟
為裁答不盡所欲吐也

新都任知縣

連日雨作暑氣亦解伏惟政成無事尊候勝常相與守
地未有見日千萬厚自持前膺最賞

二

初未得豫英遊又不同封部忽辱貽書稱誦過當何以

堪此禮再味來旨正為愛弟耳須其出即為施行也

嵩山集卷四十四